



CONCELLO DE TEO

**D.^a PATRICIA SÁNCHEZ CASTELO, SECRETARIA ACCTAL DO CONCELLO DE TEO
(A CORUÑA)**

CERTIFICA:

Que a sra. alcaldesa, con data de 13 de agosto de 2026, ditou a seguinte **RESOLUCIÓN** :

RESOLUCIÓN DA ALCALDÍA

ASUNTO: Aprobación de selo electrónico e actuacións administrativas automatizadas no Concello de Teo. Expte. 2026/G003/001028

EXPEDIENTE: 2025/X999/000643

Visto o artigo 41.1 da Lei 40/2015, do 1 de outubro, de réxime xurídico do sector público, que dispón que se entende por actuación administrativa automatizada calquera acto ou actuación realizada integramente a través de medios electrónicos por parte dunha administración pública no marco dun procedemento administrativo e na cal non interveña de maneira directa un empregado público.

Visto que o mesmo artigo, no seu apartado 2 prevé que no caso de actuación administrativa tense que establecer previamente o órgano, ou órganos competentes segundo os casos, para definir as especificacións, programación, mantemento, supervisión e control de calidade, e se procede, auditoría dos sistema de información e do código fonte. Así mesmo, tense que indicar o órgano responsable para os efectos de impugnación.

Tendo en conta que o artigo 42 da dita lei prevé que no exercicio da competencia na actuación administrativa automatizada, cada administración pública pode determinar os supostos de utilización dos seguintes sistemas de firma electrónica:

- a) Selo electrónico de Administración pública, órgano, organismo público ou entidade de dereito público, baseado nun certificado electrónico recoñecido ou cualificado que reúna os requisitos esixidos pola lexislación de firma electrónica.



CONCELLO DE TEO

- b) Código seguro de verificación (CSV) vinculado á Administración pública, órgano, organismo público ou entidade de dereito público, nos termos e condicións establecidos; permítese en todo caso a comprobación da integridade do documento mediante o acceso á sede electrónica correspondente.

Estando o selo de órgano previsto polo tanto neste artigo 42, baixo a rúbrica “Sistemas de firma para a actuación administrativa automatizada”

Considerando o disposto no artigo 70 bis.3 da Lei 7/1985, de 2 de abril, reguladora das bases de réxime local, e no uso das atribucións conferidas ao abeiro do artigo 21.1.a) e s) da devandita lei,

RESOLVO:

Primeiro.- Aprobar as actuacións administrativas automatizadas do Concello de Teo:

- Con carácter xeral: todas as actuacións e procedementos que se vaian incorporando, con carácter automatizado, á Plataforma de tramitación electrónica do Concello de Teo ou á súa sede electrónica (<https://sede.teo.gal>)

- Con carácter específico:

a) Expedición de certificados e de volantes de empadramento.

b) Expedición automática de recibos de presentación no rexistro electrónico da Administración

Segundo.- Os órganos competentes en relación coas actuacións administrativas automatizadas, en exercicio da función de fe pública administrativa, son os seguintes:

- Para a definición das especificacións ou detalle do procedemento de creación e emisión do certificado: Secretaría da Corporación.



CONCELLO DE TEO

- Para o deseño informático, programación e mantemento e auditoría do sistema de información e do código fonte: a Xerencia de Informática da Deputación da Coruña.
- Para a supervisión e control de calidade: Secretaría da Corporación.

Terceiro.- Crear o selo electrónico do Concello de Teo coa seguinte denominación: Selo de órgano do Concello de Teo,

A responsabilidade da utilización a efectos de impugnación corresponde á Alcaldía do Concello de Teo.

As características do certificado e a verificación de documentos asinados con selo de órgano poderase realizar na sede electrónica do Concello de Teo (<https://sede.teo.gal/>).

O selo electrónico de Órgano do Concello de Teo poderase utilizar nos procesos de tramitación automatizada sinalados anteriormente.

Cuarto.- A tramitación automática dos procedementos realizarase do seguinte xeito:

1. As persoas interesadas poderán iniciar a tramitación automática dos procedementos indicados no rexistro do Concello ou lugares habilitados no artigo 16 da Lei 39/2015, de 1 de outubro, de procedemento administrativo común das administracións públicas.
2. As persoas interesadas poderanse identificar e autenticar mediante documento nacional de identidade ou documento equivalente.
3. A tramitación electrónica automatizada contempla a captura automática da información contida nas bases de datos corporativas do Concello.
4. As aplicacións informáticas coas que se realizará a tramitación electrónica automatizada a que se refire esta resolución son, ademais de todas aquelas cuxa norma de creación así o prevexa, as seguintes: XESTIÓN DE PROCEDIMENTOS (TEDEC/SIGM).



CONCELLO DE TEO

5. Ostentarán permisos de Selado Electrónico unicamente as persoas que sexan empregadas públicas e que estean acreditadas pola Secretaría da Corporación.
6. O Concello emitirá resolución automatizada que recollerá expresamente, ademais do contido establecido con carácter xeral na Lei 39/2015, de 1 de outubro, de procedemento administrativo común das administracións públicas, o seguinte:
 - a) A súa condición de acto administrativo automatizado.
 - b) O selo electrónico da entidade.
 - c) O órgano que se considerará responsable a efectos de impugnación, de acordo co indicado no resolve terceiro.
7. O código electrónico de verificación permitirá verificar a autenticidade dos documentos xerados electrónica e automaticamente nos procedementos automatizados.
8. Os expedientes administrativos e documentos xerados polas citadas aplicacións almacenaranse nos sistemas de información municipais. Ditas aplicacións informáticas garantirán o control dos prazos, a identificación dos órganos responsables dos procedementos, así como a tramitación ordenada dos expedientes administrativos.
9. As indicadas resolucións serán recorribles ante o órgano xurisdiccional contencioso administrativo, previa reclamación potestativa ante a Alcaldía, na forma establecida na Lei de procedemento administrativo.
10. Os expedientes de tramitación automática archivaranse no xestor documental TEDeC SIGEM, asinado mediante selo electrónico do Concello.
11. As copias dos documentos electrónicos terán a consideración que se establece no artigo 27 da Lei 39/2015, de 1 de outubro, de procedemento administrativo común das administracións públicas.



CONCELLO DE TEO

Quinto.- Dar traslado da presente resolución aos distintos servizos administrativos da Corporación.

Sexto.- Esta resolución producirá efectos desde a súa publicación no Boletín Oficial da Provincia da Coruña. Igualmente publicarase na sede electrónica do Concello de Teo a efectos de xeral coñecemento de acordo co artigo 45.1.a) da Lei 39/2015.

Sétimo.- Dar conta ao Pleno na vindeira sesión ordinaria que se celebre.

E para que así conste, expido e asino a presente, de orde e co visto e praxe da sra. alcaldesa, en Teo na data da sinatura dixital que figura na marxe.

A secretaria acctal

Patricia Sánchez Castelo

Visto e praxe

A alcaldesa

Lucía Calvo de la Uz